



Sumáriu Kazu
Tribunál Distritál Oekusi
Juñu 2020

Afirmasaun: Sumáriu Kazu tuirmai ne'e deskreve faktu sira no prosesu iha tribunál tuir JSMP nia monitorizasaun independente, no deklarasaun ne'ebé parte sira fó iha tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Oekusi

1. Totál kazu ne'ebé JSMP monitoriza: 38

Artigu sira	Tipu kazu	Númeru
Artigu 145 Kódigu Penál (KP), konjuga ho artigu 2, 3, no 35(b) no 36 Lei Kontra Violénsia Doméstika (LKVD)	Ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika.	9
Artigu 171 no 145 KP, konjuga ho artigu 2, 3, no 35(b) no 36 (LKVD)	Koasaun seksuál ho ofensa ba integridade fízika simples ho natureza violénsia doméstika no tipu ilísitu sira kona-ba violénsia doméstika	1
Artigu 154 KP	Maus tratus ba kónjuje	3
Artigu 154 no 157 KP	Maus tratus ba kónjuje no ameasa	1
Artigu 316 KP	Kontrabandu	11
Artigu 259 KP	Danu agravadu	1
Artigu 260 KP	Danu ho violénsia	1
Artigu 140 KP	Omisídiu negligente	1
Artigu 145 KP	Ofensa ba integridade fízika simples	2
Artigu 151 KP	Ofensa korporál resíproka	5

Rua Beco Lakateu, Aldeia Manu fuik,
Suku Colmera, Administrativu Vera Cruz
Dili Timor-Leste

PoBox: 275

Telefone: 3323883 | 77040753

Website: <https://jsmp.tl>
info@jsmp.tl

Facebook: www.facebook.com/timorleste.jsmp

Twitter: @JSMPtl

Artigu 157 KP	Ameasa	1
Artigu 207 KP	Kondusaun sein karta	2
Totál		38

2. Totál desizaun ne'ebé JSMP monitoriza : 15

Tipu desizaun	Númeru
Suspensaun ba prizaun nia ezekusaun (Artigu 68 KP)	4
Pena multa (Artigu 67 KP)	2
Izensaun ba pena (Artigu 318)	2
Absolve	1
Omologa pedidu dezisténsia	6
Totál	15

3. Totál kazu sira ne'ebé adia tuir JSMP monitorizasaun : 15

Razaun adiamentu	Númeru
Arguidu/a no lezadu/a sira la marka prezensa	14
Lezadu ba Dili no la konsege notifika	1
Totál	15

4. Total kazu sira ne'ebé kontinua prosesu tuir JSMP nia monitorizasaun: 8

B. Deskripsaun sumáriu julgamentu ba desizaun kazu sira

1. Krime ofensa ba integridade fízika simples

Nú. Prosesu : 0002/19.OEPMK
 Kompozisaun Tribunál : Singulár
 Juis : Dr. Hugo da Cruz Pui
 Prokuradór : Dr. Mateus Nesi
 Defeza : Dr. Marcelino Marques Coro
 Desizaun : Omologa pedidu dezisténsia keixa

Iha 05 Juñu 2020, Tribunál Distritál Oekusi prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Francisco da Cunha hasoru lezadu Hermenegildo da Cunha nu'udar arguidu nia maun, iha Distritu Oekusi.

Akuzasaun Prokuradór

Prokuradór akuza katak iha 03 Marsu 2019, iha oras tuku 06:00 dadeer, arguidu foti ai-teka sanak ida no baku dala tolu iha lezadu nia kotuk laran rezulta bubu, mean no moras. Antes ne'e, lezadu nia fahi han estraga tiha arguidu nia batar iha toos laran. Ho nune'e sira diskute malu to'o arguidu halo agresau hasoru lezada. Kazu ne'e aneksa ho relatóriu médiku husi Ospital Referál Oekusi no fotografia husi polísia.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál mínimu loron 30 prizaun no másimu to'o tinan 3 prizaun ka multa.

Produsaun ba prova sira

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, antes tama ba prosesu produsaun ba prova sira, tribunál husu ba parte sira atu halo tentativa konsiliaun.

Iha prosesu tentativa konsiliaun ne'e, lezadu deklara katak nia hakarak deziste tiha nia keixa hasoru arguidu sein kondisaun ruma. Arguidu konkorda ho pedidu ne'e no hakarak dame malu ho lezadu nu'udar nia maun. Arguidu mós promete sei la komete tan krime hasoru lezadu.

Alegasaun finál

Prokuradór no defeza konkorda ho parte rua nia akordu dame ne'e no husu ba tribunál atu omologa prosesu ne'e.

Desizaun

Bazeia ba pedidu dezisténsia keixa husi lezadu no akordu dame husi parte sira, tribunál omologa prosesu ne'e.

2. Krime ofensa korporál resíproka

Nú. Prosesu	: 0023/19.OEPMK
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Matias Soares
Defeza	: Dr. Calisto Tout
Desizaun	: Omologa pedidu dezisténsia keixa

Iha 09 Juñu 2020, Tribunál Distritál Oekusi prezide julgamentu tentativa konsiliaun ba krime ofensa korporál resíproka ne'ebé envolve MPC no VdF ne'ebé iha relasaun namoradu, iha Distritu Oekusi.

Akuzasaun Prokuradór

Prokuradór akuza katak iha 22 Juñu 2019, iha oras tuku 16:30 lokraik, arguidu MPC tuku dala ida iha lezada VdF nia reen-toos, rakut VdF nia fu'uk no sama iha kanotak parte loos. Aktu hirak ne'e, rezulta VdF sofre moras iha fatin sira ne'ebé hetan agresau. Prokuradór mós akuza VdF nu'udar arguida tanba hafoin arguidu MPC baku, VdF foti lamina ida no koa dala ida iha arguidu MPC nia hirus-matan rezulta kanek no ran. Antes agresau hirak ne'e, MPC deskonfia VdF amante ho mane seluk. Kazu ne'e aneksa ho relatóriu médiku husi Ospital Referál Oekusi no fotografia husi polísia.

Prokuradór akuza arguidu MPC no arguida VdF kontra artigu 151 KP kona-ba ofensa korporál resíproka ho moldura penál to'o tinan 2 ka multa tanba sira na'in rua ofende malu iha isin ka saúde.

Produsaun ba prova sira

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, antes tama ba produsaun ba prova sira, tribunál husu ba parte sira atu halo tentativa konsiliaun.

Iha prosesu tentativa konsiliaun ne'e, MPC no VdF deklarata katak sira na'in rua hakarak deziste tiha keixa tanba sira dame malu ona.

Alegasaun final

Prokuradór no defeza konkorda ho parte rua nia akordu ne'e no husu tribunál atu omologa prosesu ne'e.

Desizaun

Bazeia ba pedidu dezisténsia no akordu dame husi MPC no VdF, tribunál omologa prosesu ne'e.

3. Krime kondusaun sein karta

Nú. Prosesu	: 0008/19.OESTR
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Mateus Nesi
Defeza	: Dr. Marcelino Marques Coro
Desizaun	: Pena multa US\$30.00

Iha 09 Juñu 2020, Tribunál Distritál Oekusi prezide julgamentu leitura sentensa ba krime kondusaun sein karta ne'ebé envolve arguidu Fernando Ase Timo hasoru Estadu RDTL, iha Distritu Oekusi.

Akuzasaun Prokuradór

Prokuradór akuza katak iha 29 Maiu 2019, iha oras tuku 12.00 meiodia, arguidu kondús motor ho marka Honda Supra X 125, laiha xapa matrikula iha dalan públiku Manuipena no arguidu soke mikrolete ida husi kotuk. Bainhira halo pasa revista polísia deskobre katak arguidu laiha karta kondusaun inklui laiha dokumentu sira motorizada nian.

Prokuradór akuza arguidu kontra artigu 207 KP kona-ba krime kondusaun sein karta ne'ebé ho moldura penál to'o tinan 2 ka multa.

Produsaun ba prova sira

Iha julgamentu, arguidu konfesa faktu sira iha akuzasaun no deklar katak arrepende ninia hahalok. Arguidu mós deklar katak foin primeiravés mai hatan iha tribunál, serbisu iha kompresor motor iha bairo Masin ho rendimentu kada fulan US\$150.00 no arguidu sei klosan. Arguidu reforsa liu tan katak arguidu trata ona nia karta kondusaun iha Diresaun Transporte Terrestre.

Prokuradór husu ba tribunál atu presinde depoimentu husi testemuña ne'ebé antes ne'e prokuradór arola ona atu rona. Defeza konkorda ho pedidu ne'e. Tanba ne'e, tribunál deside presinde testemuña nia depoimentu.

Alegasaun final

Prokuradór haktuir katak kazu kondusaun sein karta kontinua akontese no ida ne'e bele fó risku ba ema seluk nia vida. Hanesan iha kazu ne'e, arguidu seidak hatene kondús motor maibé halai iha dalan públiku. Ho nune'e, husu ba tribunál atu aplika pena multa ba arguidu bazeia ba artigu 207 KP.

Enkuantu defeza haktuir katak iha produsaun ba prova arguidu konfesa faktu hotu, arguidu mós arrepende ona ninia hahalok, arguidu sei klosan no foin primeiravés mai hatan iha tribunál. Tanba ne'e, husu ba tribunál atu aplika pena ne'ebé kmaan ba arguidu tuir nia sala.

Desizaun

Depoizde avalia faktu sira hotu, tribunál prova katak arguidu kondús motor ho marka Honda Supra X 125, laiha xapa matrikula, laiha karta kondusaun inklui laiha dokumentu sira motorizada nian no soke mikrolete ida husi kotuk. Bazeia ba prova sira ne'e no tetu sirkunstánsia hotu-hotu, nune'e tribunál konklui prosesu ne'e no kondena arguidu ho pena multa US\$30.00 ne'ebé kada lora arguidu sei selu US\$0.50 durante lora 60. Tribunál mós fiksa pena alternativa durante lora 40 prizaun bainhira arguidu la kumpri pena multa ne'e.

4. Krime ofensa ba integridade física simples ho natureza violénsia doméstika

Nú. Prosesu : 0029/19.OESIC

Kompozisaun Tribunál : Singulár

Juis : Dr. Hugo da Cruz Pui
Prokuradór : Dr. Matias Soares
Defeza : Dr. Marcelino Marques Coro
Desizaun : Pena prizaun tinan 1 suspende ba tinan 1 fulan 6

Iha 10 Juñu 2020, Tribunál Distritál Oekusi prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu CTS hasoru nia feen ENC, iha Distritu Oekusi.

Akuzasaun Prokuradór

Prokuradór akuza katak iha 22 Feveireiru 2019, iha oras tuku 20:00 kalan, arguidu lees lezada nia faru iha nia isin loloon no rasta lezada husi estrada públiku tama to'o uma laran. Aleinde ne'e, arguidu tuku dala ida iha lezada nia kotuk laran no arguidu lori katana atu ko'a lezada nia kalsa maibé lezada satan-netik ho nia liman nune'e katana kona kois iha lezada nia liman fuan boot parte loos rezulta kanek ki'ik no ran. Antes ne'e, iha oras tuku 12:00 meidia, lezada ba iha nia maun sira iha Palaban no filafali ba sira nia uma iha oras tuku 20:00 kalan. Kazu ne'e aneksa hamutuk ho relatóriu médiku husi Ospital Referal Oekusi no fotografia husi polisia.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa ho forma krime iha konkursu tuir artigu 35 KP no konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklarata katak arrepende ninia hahalok. Arguidu mós promete sei la halo tan hahalok hanesan iha futuru. Arguidu hatutan katak sira dame malu ona, foin primeiravés mai hatan iha tribunál, arguidu nu'udar agrikultór ho rendimentu kada fulan US\$40.00 no iha oan na'in ualu.

Tribunál deside la rona ona deklarasaun lezada nian tanba iha produsaun ba prova arguidu konfesa integralmente ba faktu sira iha akuzasaun.

Alegasaun final

Prokuradór konsidera arguidu provadu halo agresaun fízika hasoru nia feen bazeia ba arguidu nia konfisaun. Prokuradór mós haktuir katak arguidu koko ko'a lezada nia kalsa to'o rezulta lezada nia liman fuan kanek ki'ik no ida ne'e bele hatoman arguidu atu iha loron seluk arguidu bele uza fali katana hodi ta'a lezada. Bazeia ba argumentu sira ne'e, husu ba tribunál atu kondena arguidu ho pena prizaun tinan ida fulan neen suspende ba tinan rua.

Enkuantu defeza husu ba tribunál atu aplika pena ne'ebé kmaan ba arguidu tanba arguidu konfesa integralmente ba faktu sira iha akuzasaun, arrepende ona ninia hahalok, dame malu ona

ho lezada no kolabora ho tribunál. Aleinde ne'e arguidu promete ona katak sei la halo tan krime hasoru nia membru família ka ema seluk iha futuru.

Desizaun

Depoisde tetu faktu sira hotu, tribunál prova katak arguidu lees lezada nia faru iha isin loloon, rasta lezada husi estrada públiku tama to'o uma laran no tuku lezada dala ida iha kotuk laran. Tribunál mós prova katak arguidu uza katana ko'a lezada nia kalsa maibé kona fali lezada nia liman tanba lezada satan-netik ho nia liman.

Bazeia ba prova hirak ne'e no konsidera mós ba sirkunstánsia atenuante sira hanesan arguidu konfesa, arrepende ona ninia hahalok, dame malu ona ho lezada, foin primeiravés halo krime, rendimentu kada fulan US\$40.00 no promete sei la repete ninia hahalok iha futuru, nune'e tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen no aplika kustu judisiál US\$20.00.

5. Krime ofensa korporál resíproka

Nú. Prosesu : 0092/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Mateus Nesi
Defeza : Dr. Marcelino Marques Coro
Desizaun : Omologa pedidu dezisténsia keixa

Iha 10 Juñu 2020, Tribunál Distritál Oekusi prezide julgamentu tentativa konsiliaun ba krime ofensa korporál resíproka ne'ebé envolve IA (feen) hasoru JC (la'en), iha Distritu Oekusi.

Akuzasaun Prokuradór

Prokuradór akuza katak iha 29 Juñu 2019, iha oras tuku 16:00 lokraik, arguida IA uza ai-pedasuk ida no baku lezadu JC dala rua iha ain parte loos, dala ida iha liman parte loos no tata dala ida iha lezadu nia liman laran (liman tanen) parte karuk rezulta moras. Prokuradór mós akuza JC nu'udar arguidu tanba hafoin IA baku nia, JC fila tuku IA dala tolu iha reen-toos no tebe dala rua iha kelen parte karuk rezulta lezada desmaia no sofre moras. Kazu ne'e aneksa hamutuk ho relatóriu médiku husi Ospital Referál Oekusi no fotografia husi polísia.

Prokuradór akuza arguidu JC ho arguida IA kontra artigu 151 KP kona-ba ofensa korporál resíproka ho moldura penál to'o tinan 2 ka multa tanba sira na'in rua ofende malu iha isin ka saúde.

Produsaun ba prova sira

Bazeia ba artigu 262 KPP kona-ba tentativa ba konsiliaun ba kazu krime sira ho natureza semi-públiku, antes tama ba prosesu produsaun ba prova sira, tribunál husu ba sira na'in rua atu halo tentativa konsiliaun.

Iha prosesu tentativa konsiliaun ne'e, sira na'in rua hakarak no konkorda deziste tiha keixa kontra malu ne'e tanba sira na'in rua dame malu ona.

Alegasaun final

Prokuradór no defeza konkorda ho parte rua nia akordu ne'e no husu ba tribunál atu omologa prosesu ne'e.

Desizaun

Bazeia ba pedidu dezisténsia keixa no akordu dame husi IA no JC, tribunál omologa prosesu ne'e.

6. Krime kondusaun sein karta

Nú. Prosesu	: 0013/19.OESTR
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Matias Soares
Defeza	: Dr. Calisto Tout
Desizaun	: Pena multa US\$60.00

Iha 12 Juñu 2020, Tribunál Distritál Oekusi prezide julgamentu leitura sentensa ba krime kondusaun sein karta ne'ebé envolve arguidu Guido Eco hasoru Estadu RDTL, iha Distritu Oekusi.

Akuzasaun Prokuradór

Prokuradór akuza katak iha 26 Jullu 2019, iha oras tuku 14:50 lokraik, arguidu kondús motorizada ho marka *mio* iha dalan públiku husi diresaun Numbey atu ba uma iha Oesono la tuir dalan loloos. Ho nune'e polísia tranzitu hapara arguidu hodi halo pasa revista hafoin deskobre katak arguidu laiha karta kondusaun no laiha dokumentu motor nian.

Prokuradór akuza arguidu kontra artigu 207 KP kona-ba krime kondusaun sein karta ne'ebé ho moldura penál to'o tinan 2 ka multa.

Produsaun ba prova

Iha julgamentu, arguidu konfesa faktu hotu iha akuzasaun no deklara katak arrepende ninia hahalok ne'e. Arguidu mós deklara foin primeiravés mai hatan iha tribunál, serbisu nu'udar

badaen fatuk ho rendimentu kada fulan US\$100.00 no iha oan na'in haat. Arguidu haktuir tan katak antes ne'e, laiha duni karta kondusaun maibé agora iha ona karta kondusaun.

Prokuradór husu ba tribunál atu presinde testemuña nia depoimentu ne'ebé antes ne'e prokuradór arola ona atu rona.

Alegasaun final

Prokuradór haktuir katak krime kondusaun sein karta sempre akontese no iha kazu ida ne'e bele fó risku ba ema seluk tanba arguidu kondús motorizada iha dalan públiku no laiha karta kondusaun. Tanba ne'e, husu ba tribunál atu aplika pena multa US\$0.50 kada loron durante loron 90 tuir artigu 207 KP.

Enkuantu defeza haktuir katak arguidu perante tribunál konfesa faktu hotu, arrepende ona ninia hahalok no foin primeiravés mai hatan iha tribunál. Aleinde ne'e, arguidu nu'udar badaen fatuk ho rendimentu kada fulan US\$100.00 maibé dalaruma la hetan osan no arguidu iha oan na'in haat. Agora dadaun arguidu iha ona karta kondusaun, tanba ne'e husu ba tribunál atu aplika pena ne'ebé adekua ba arguidu.

Desizaun

Depoide avalia faktu hotu, tribunál prova arguidu kondús motor iha dalan públiku maibé la tuir dalan loloos, laiha karta kondusaun inklui laiha dokumentu motor nian, nune'e tribunál konklui prosesu ne'e no kondena arguidu ho pena multa US\$60.00 ne'ebé arguidu sei selu US\$0.50 kada loron durante loron 120. Tribunál mós kondena arguidu selu kustu judisiál US\$20.00. Bainhira arguidu la selu pena multa ne'e, arguidu sei kumpri iha prizaun durante loron 80 prizaun nu'udar pena alternativu.

7. Krime ofensa ba integridade física simples ho natureza violénsia doméstika

Nú. Prosesu	: 0021/19.OEPMK
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Mateus Nesi
Defeza	: Dr. Calisto Tout
Desizaun	: Pena prizaun tinan 1 suspende ba tinan 1 fulan 6

Iha 15 Juñu 2020, Tribunál Distritál Oekusi prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu ME hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 09 Marsu 2019, iha oras tuku 19:00 kalan, arguidu rakut lezada nia fuuk no riba tun ba rai rezulta lezada sofre kanek ki'ik no ran iha ulun. Antes ne'e, lezada husu

osan ba arguidu atu sosa hare-uut tanba arguidu rasik mak kaer nia saláriu maibé arguidu la fó osan atu hola hare-uut ne'e, nune'e sira diskute malu no mosu agresaun ne'e. Kazu ne'e aneksa hamutuk ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa faktu hotu iha akuzasaun prokuradór nian no deklarata katak agresaun hasoru ema ne'e sei prejudika ema nia saúde fízika no bele rezuta moras no kanek. Mezmu nune'e, arguidu arrepende ona ninia hahalok no promete sei la halo tan hahalok hanesan hasoru lezada iha futuru. Arguidu deklarata mós katak sira di'ak malu ona to'o agora, foin primeiravés mai hatan iha tribunál, iha oan na'in hitu no serbisu nu'udar seguransa sivil ho rendimentu kada fulan US\$225.00.

Prokuradór husu ba tribunál atu la rona ona lezada nia deklarasaun tanba iha produsaun ba prova arguidu konfesa integralmente ba faktu sira iha akuzasaun.

Alegasaun finál

Prokuradór konsidera arguidu provadu halo agresaun fízika hasoru lezada ne'ebé tuir loloos arguidu mak tenke proteje lezada. Aleinde ne'e arguidu halo krime ne'e ho livre, konsientemente no aproveita situasaun ne'ebé adekuada halo agresaun hirak ne'e hasoru lezada mezmu lezada rasik laiha forsa tanba hanesan feto. Bazeia ba konsiderasaun sira ne'e, husu ba tribunál atu kondena arguidu tuir moldura penál ne'ebé regula ona iha artigu 145 KP.

Enkuantu defeza haktuir katak arguidu konfesa integralmente ba faktu sira iha akuzasaun maibé arguidu arrepende ona ninia hahalok, dame malu ona ho lezada, kolabora ho tribunál no arguidu mós promete ona sei la halo tan krime hasoru nia membru família ka ema seluk iha futuru. Bazeia ba konsiderasaun sira ne'e, husu ba tribunál atu aplika pena ne'ebé adekuadu.

Desizaun

Depois avalia faktu hotu, tribunál prova katak arguidu rakut lezada nia fuuk no riba lezada tun ba rai. Bazeia ba prova sira no tetu sirkunstánsia agravante ho atenuante sira hotu, tribunál konklui prosesu ne'e no kondena arguidu ho pena prizaun tinan ida suspende ba tinan ida fulan neen inklui kondena arguidu selu kustu judisiál US\$60.00.

8. Krime ofensa korporál resíproka

Nú. Prosesu : 0047/19.OESIC
Kompozisaun Tribunál : Singulár
Juis : Dr. Hugo da Cruz Pui

Prokuradór : Dr. Matias Soares
Defeza : Dr. Marcelino Marques Coro
Desizaun : Omologa pedidu dezisténsia keixa

Iha 16 Juño 2020, Tribunál Distritál Oekusi prezide julgamentu tentativa konsiliaun ba krime ofensa korporál resíproka ne'ebé envolve JP (feen) no ACA (la'en), iha Distritu Oekusi.

Akuzasaun Prokuradór

Prokuradór akuza katak iha 04 Marsu 2019, iha oras tuku 20:00 kalan, arguida JP uza lapizeira ida fai dala ida iha lezadu ACA nia matan karuk rezulta kanek no ran. Prokuradór mós akuza lezadu ACA nu'udar arguidu tanba tuku dala ida iha JP nia oin no tebe dala ida iha oin rezulta bubu. Hafoin akontesimentu ne'e, ACA ba halo tratamentu iha Ospital Referral Oekusi.

Prokuradór akuza arguida no arguidu kontra artigu 151 KP kona-ba ofensa korporál resíproka ho moldura penál to'o tinan 2 ka multa tanba JP no ACA ofende malu iha isin ka saúde.

Produsaun ba prova sira

Bazeia ba artigu 262 Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, tribunál husu atu halo tentativa konsiliaun ba JP no ACA.

Iha prosesu konsiliaun ne'e, JP no ACA konkorda dame malu no hakarak atu deziste tiha keixa ne'e. Aleinde ne'e, sira mós deklara katak arrepente ona sira ninia hahalok no promete sei la repete tan hahalok hanesan iha futuru.

Alegasaun final

Prokuradór no defeza laiha opsau no konkorda ho akordu dame ne'ebé JP no ACA decide ona no husu ba tribunál atu omologa prosesu ne'e.

Desizaun

Bazeia ba pedidu dezisténsia no akordu dame husi JP no ACA , tribunál konklui prosesu ne'e no omologa akordu refere.

9. Krime ofensa ba integridade física simples ho natureza violénsia doméstika

Nú. Prosesu : 0051/19.OESIC
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Matias Soares
Defeza : Dr. Filipe Landos (advogadu privadu)
Desizaun : Pena prizaun tinan 1suspense ba tinan 1

Iha 17 Juñu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JSB hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 02 Abril 2019, iha oras tuku 22:00 kalan, arguidu basa dala rua iha lezada nia hasan karuk, tuku dala rua iha kanuruk no rasta lezada iha rai rezulta bubu no lezada desmaia. Antes ne'e, lezada haruka arguidu atu ba sosa labarik nia *popok* maibé arguidu hirus no halo agresaun refere hasoru lezada. Kazu ne'e aneksa hamutuk ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa parsialmente faktu sira no deklara katak nia basa lezada dala ida deit iha hasan parte karuk no tuku dala ida iha matan fukun parte karuk. Arguidu mós rejeita basa lezada dala rua iha hasan parte karuk, tuku dala rua iha kanuruk no rasta lezada iha rai. Arguidu deklara katak arrepende ninia hahalok, di'ak malu ona ho lezada, foin primeiravés halo agresaun hasoru lezada no mai hatan iha tribunál. Aleinde ne'e, arguidu hatutan katak nia nu'udar profesór voluntáriu iha STM ne'ebé ho rendimentu US\$75.00 kada fulan no iha oan na'in rua.

Entretantu lezada konfirma hotu deklarasaun arguidu nian inklui deklara katak sira hola malu iha 2017 no iha agresaun ne'e laiha ema ruma mak haree tanba sira na'in rua mesak de'it iha uma.

Alegasaun finál

Prokuradór konsidera arguidu provadu komete krime hasoru lezada tuir faktu sira iha akuzasaun. Tanba ne'e, maski arguidu di'ak malu ona ho lezada, maibé haree ba realidade katak número krime violénsia doméstika akontese barak liu iha Rejiaun Oekusi, nune'e husu ba tribunál atu kondena arguidu ho pena prizaun tinan rua suspende ba tinan rua fulan neen.

Entretantu, defeza husu ba tribunál atu kondena arguidu ho pena ne'ebé adekua tanba arguidu konfesa ninia hahalok maski parsialmente maibé lezada konfirma. Aleinde ne'e, arguidu arrepende ona ninia hahalok, kolabora di'ak ho tribunál, di'ak malu ona ho lezada, fo'in primeiravés mai hatan iha tribunál. Arguidu nu'udar profesór voluntáriu iha STM ne'ebé ho rendimentu kada fulan US\$75.00 no arguidu mak iha responsabilidade ba nia feen ho nia oan na'in rua.

Desizaun

Depoisde avalia faktu hotu, tribunál prova katak arguidu basa lezada dala rua iha hasan parte karuk, tuku dala rua iha kanuruk no rasta lezada iha rai. Bazeia ba prova sira ne'e no konsidera mós ba sirkunstánsia agravante no atenuante sira hotu, tribunál konklui prosesu ne'e no kondena arguidu ho pena prizaun tinan ida suspende ba tinan ida inklui kondena arguidu kustu judisiál US\$40.00.

10. Krime ofensa korporál resíproka

Nú. Prosesu : 0016/19.OEPMK
Kompozisaun Tribunál : Singulár
Juis : Dr. Hugo da Cruz Pui
Prokuradór : Dr. Matias Soares
Defeza : Dr. Marcelino Marques Coro
Desizaun : Omologa pedidu dezisténsia keixa

Iha 17 Juñu 2020, Tribunál Distritál Oekusi prezide julgamentu tentativa konsiliaun ba krime ofensa korporál resíproka ne'ebé envolve RCB (feen) no AL (la'en), iha Distritu Oekusi.

Akuzasaun Prokuradór

Prokuradór akuza katak iha 28 Maiu 2019, iha oras tuku 23:00 kalan, arguida RCB tebe dala ida iha lezadu AL nia kelen parte karuk, tuku dala rua iha kotuk laran, tata dala rua iha kotuk laran no tata dala ida iha lezadu nia hirus-matan. Aktu sira ne'e rezulta kanek ki'ik iha kotuk laran no hirus-matan. Prokuradór mós akuza lezadu AL nu'udar arguidu tanba hafoin arguida RCB halo agresaun ne'e, AL tuku dala ida iha RCB nia hasan parte karuk no tebe dala ida iha kelen parte karuk rezulta moras. Antes halo agresaun hirak ne'e, AL deskonfia RCB amante ho mane seluk. Ho nune'e, sira diskute malu to'o mosu agresaun. Hafoin akontesimentu ne'e, lezadu AL ba halo tratamentu iha Ospital Referál Oekusi.

Prokuradór akuza arguida no arguidu kontra artigu 151 KP kona-ba ofensa korporál resíproka ho moldura penál to'o tinan 2 ka multa tanba arguidu no arguida ofende malu iha isin ka saúde.

Produsaun ba prova sira

Bazeia ba artigu 262 Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, tribunál husu atu halo tentativa konsiliaun ba RCB no AL.

Iha prosesu konsiliaun ne'e, RCB no AL hakarak atu dame malu no husu ba tribunál atu deziste tiha keixa ne'e. Aleinde ne'e, sira deklara katak arrepende ona sira ninia hahalok no promete sei la repete tan hahalok hanesan iha futuru.

Alegasaun final

Prokuradór no defeza laiha opsaun no apresia ba akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba pedidu dezisténsia no akordu dame husi RCB no AL, tribunál konklui prosesu ne'e no omologa tiha akordu ne'e.

11. Krime ofensa ba integridade fízika simples ho natureza violénsia doméstika

Nú. Prosesu	: 0064/19.OESIC
Kompozisaun Tribunál	: Singulár
Juis	: Dr. Hugo da Cruz Pui
Prokuradór	: Dr. Mateus Nesi
Defeza	: Dr. Calisto Tou
Desizaun	: Pena prizaun tinan 1 fulan 6 suspende ba tinan 2

Iha 17 Juñu 2020, Tribunál Distritál Oekusi prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu VQ hasoru nia feen, iha Distritu Oekusi.

Akuzasaun Prokuradór

Prokuradór akuza katak iha 08 Maiu 2019, iha oras tuku 19:00 kalan, arguidu tuku dala ida iha lezada niaibun rezulta kanek ki'ik, ran no bubu. Antes ne'e, lezada fila husi nia inan-aman sira kalan ona. Ho nune'e, arguidu no lezada diskute malu no arguidu halo agresaun ne'e hasoru lezada. Kazu ne'e aneksa hamutuk ho relatóriu médiku husi PRADET no fotografia husi Polísia-VPU.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa no konjuga ho artigu 2, 3(a), 35(b) no 36 LKVD.

Produsaun prova sira

Iha julgamentu, arguidu konfesa parsialmente faktu sira iha akuzasaun katak arguidu la'os tuku maibé basa dala ida iha lezada niaibun. Arguidu mós deklara katak nia hatene kuandu baku ema sei prejudika ema nia saúde fíziku no sofre moras ka kanek maibé arguidu nafatin halo. Mezmu nune'e, arguidu deklara arrepende ninia hahalok no promete sei la halo tan hahalok hanesan hasoru lezada iha futuru no di'ak malu ona ho lezada to'o agora. Arguidu mós foin primeiravés mai hatan iha tribunál, serbisu nu'udar agrikultór ho rendimentu kada fulan US\$50.00 no iha oan na'in lima.

Entretantu lezada konfirma arguidu nia deklarasaun katak arguidu basa lezada dala ida ihaibun la'os tuku. Lezada haktuir tan katak sira di'ak malu ona no to'ogora no momentu arguidu halo agresaun ne'e laiha ema ruma mak haree.

Prokurador husu ba tribunál atu presinde depoimentu husi testemuña (viziñu) tanba iha momentu ne'ebá kuandu arguidu basa lezada no laiha ema ruma mak haree no defeza mós konkorda ho pedidu ne'e. Tanba ne'e, tribunál presinde hodi la rona ona testemuña nia depoimentu.

Alegasaun final

Prokurador konsidera katak arguidu prova duni halo agresaun física hasoru lezada hodi prejudika lezada nia física no psikolójia. Arguidu halo agresaun ne'e hasoru feto ne'ebé laiha forsa atu halo reasaun hasoru arguidu. Aleinde ne'e, haree ba número kazu violénsia doméstika ne'ebé aas iha Oekusi kumpara ho munisípiu sira seluk nune'e atu halo prevensaun jéral ba krime refere, husu ba tribunál atu kondena arguidu tuir artigu 145 KP.

Entretantu, defeza husu ba tribunál atu kondena arguidu ho pena ne'ebé adekua ho konsiderasaun katak iha produsaun ba prova arguidu kolabora di'ak ho tribunál no konfesa faktu hotu iha akuzasaun. Arguidu mós arrepende ona ninia hahalok, iha oan na'in lima no dame malu ona ho lezada no arguidu serbisu hanesan agrikultór ne'ebé laiha rendimentu fiksi kada fulan.

Desizaun

Tribunál prova katak arguidu basa dala ida iha lezada nia ibun. Tribunál mós konsidera arguidu nia hahalok ne'e hanesan dolo direitu tanba arguidu halo duni agresaun ne'e hasoru lezada. Bazeia ba faktu provadu sira ne'e no tetu mós ba sirkunstánsia sira hotu ne'ebé haleu iha krime ne'e, tribunál kondena arguidu ho pena prizaun tinan ida fulan neen suspende ba tinan rua inklui kondena arguidu selu kustu judisiál US\$40.00.

12. Krime ameasa

Nú. Prosesu	: 0003/19.OESIC
Kompozisaun Tribunál	: Singulár
Juis	: Dr. Hugo da Cruz Pui
Prokurador	: Dr. Matias Soares
Defeza	: Dr. Marcelino Marques Coro
Desizaun	: Omologa pedidu dezisténsia keixa

Iha 18 Juñu 2020, Tribunál Distritál Oekusi prezide julgamentu tentativa konsiliaun ba krime ameasa ne'ebé envolve arguidu Jose Manka Teme hasoru lezadu Raimundo Suni nu'udar arguidu nia primu, iha Suku Lifau Sub-distritu Pante-makasar, Distritu Oekusi.

Akuzasaun Prokuradór

Prokuradór akuza arguidu katak iha 30 Janeiru 2019, iha oras tuku 15:00 lokraik, arguidu kaer katana ida no ba buka lezadu iha lezadu nia to'os hodi hatudu katana ba lezadu no hateten ba lezada dehan "*hau sei buka tempu ida hodi ta'a mate ó*". Arguidu nia hahalok ne'e halo lezadu trauma no ta'uk hodi ba apresenta keixa iha polísia. Antes ne'e, lezadu ko'alia katak arguidu nia aman buan.

Prokuradór akuza arguidu kontra artigu 157 KP kona-ba ameasa ho moldura penál to'o tinan 2 ka multa.

Produsaun ba prova sira

Bazeia ba artigu 262 Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, tribunál husu atu halo tentativa konsiliaun ba arguidu no lezadu.

Iha prosesu konsiliaun ne'e, lezadu hakarak dada fali nia keixa no arguidu mós konkorda. Arguidu deklara katak arrepende ona ninia hahalok no promete sei la repete tan hahalok iha futuro, nune'e lezadu husu ba tribunál atu deziste tiha ninia keixa hasoru arguidu ne'e.

Alegasaun finál

Prokuradór no defeza apresia akordu dame ne'ebé parte rua deside ona no husu ba tribunál atu omologa prosesu ne'e.

Desizaun

Bazeia ba pedidu dezisténsia husi lezadu no akordu dame husi parte rua, tribunál konklui prosesu ne'e no omologa akordu dame ba prosesu refere.

13. Krime danu simples no krime ofensa ba integridade fízika simples

Nú. Prosesu	: 0059/18.OESIC
Kompozisaun Tribunál	: Koletivu
Juis	: Dr. Hugo da Cruz Pui, Dr. Evangelino Belo no Dr. Yudi Pamukas
Prokuradór	: Dr. Matias Soares
Defeza	: Dr. Marcelino Marques Coro
Desizaun	: Omologa dezisténsia keixa

Iha 25 Juñu 2020, Tribunál Distritál Oekusi prezide julgamentu leitura akordaun ba krime danu simples no krime ofensa ba integridade fízika simples ne'ebé envolve arguidu Rezedio Antonio Mesquita Alves hasoru lezadu Muhamad Tahir (Sidadaun Indonezia), lezada Luiza Nufa Quefi no lezadu Luis Fernandes, iha Distritu Oekusi.

Akuzasaun Prokuradór

Prokuradór akuza katak iha 18 Abril 2018, iha oras tuku 23:15 kalan, arguidu tebe estraga odamatan restaurante nian no tama ba uma laran no basa lezadu Muhammad dala ida iha hasan parte karuk halo lezadu ta'uk. Depoisde ne'e, arguidu atu kontinua basa tan lezada Luiza maibé la kona tanba lezada satan ho nia liman. Arguidu atu buti lezada nia kakorok maibé la konsege tanba lezada hases-an. Antes ne'e, arguidu ho kondisaun lanu no hakarak atu han *es-cendol* mezmu restaurante ne'e taka ona. Kazu ne'e aneksa hamutuk ho relatóriu médiku husi Ospital Referál Oekusi no fotografia husi polísia.

Prokuradór akuza arguidu kontra artigu 260 KP kona-ba krime danu ho violénsia ho moldura penál tinan 4 to'o tinan 12 prizaun.

Produsaun ba prova sira

Iha prosesu julgamentu, arguidu konfesa faktu sira iha akuzasaun no arguidu hatene hahalok hanesan ne'e ladi'ak nune'e arrepente ninia hahalok. Arguidu haktuir tan katak depoisde akontesimentu ne'e, arguidu hadia hikas odamatan ne'ebé hetan estragu, dame malu ona ho lezadu/a no iha karta akordu dame malu ne'e. Antes krime ida ne'e, arguidu deklara katak antes nia komete krime hasoru nia feen no hetan pena multa US\$40.00. Arguidu serbisu hanesan funsionáriu ho rendimentu kada fulan US\$510.00 no arguidu iha oan na'in lima. Arguidu promete katak sei la halo tan krime hasoru lezadu/a ka ema seluk iha futuro.

Entretantu lezadu Muhammad Tahir laiha relasaun família ho arguidu no serbisu hanesan ajudante iha Restaurante hateten katak arguidu ho kondisaun lanu ba hakilar atu han *es-cendol*. Lezadu mós deklara katak arguidu tebe estraga odamatan restaurante nian hafoin tama ba uma laran hodi basa lezadu dala ida iha hasan karuk. Mezmu nune'e, lezadu deklara katak nia perdua arguidu no sira dame malu ona.

Lezada Luiza Nufa Quefi deklara katak nia laiha relasaun família ho arguidu no lezada serbisu hanesan ajudante iha restaurante ne'e deklara katak loos duni arguidu tenta atu basa lezada maibé la kona tanba lezada satan ho nia liman no arguidu atu buti lezada iha kakorok maibé la konsege tanba lezada hases-an. Lezada mós deklara katak ho vontade rasik perdua arguidu no sira dame malu ona.

Depoisde rona tiha parte sira, tribunál intende no konsidera Luis Fernandes nu'udar lezadu ba krime danu simples tanba lezadu mak na'in ba restaurante ne'e. Relasiona ho ne'e, prokuradór no defeza laiha opsaun seluk no aseita ho tribunál ninia konviksaun ne'e.

Iha julgamentu, lezadu Luis Fernandes mós deklara katak nia laiha relasaun família ho arguidu no nu'udar na'in ba restaurante ne'e. Lezadu hatutan katak iha momentu akontesimentu ne'e

lezadu laiha fatin maibé konfirma katak odamatan ne'ebé estraga, arguidu hadia ona ho valór US\$15.00. Lezadu mós konfirma katak arguidu no lezadu/a sira iha ona karta akordu dame.

Prokuradór husu ba tribunál koletivu atu presinde testemuña sira nia depoimentu. Parte defeza konkorda ho prokuradór nia pedidu ne'e. Tanba ne'e, tribunál presinde testemuña sira nia depoimentu ba prosesu kazu refere.

Alegasaun finál

Prokuradór konsidera arguidu provadu komete krime danu ho violénsia tuir faktu sira iha akuzasaun no pior liutan maski restaurante taka ona maibé arguidu ho forsa tebe estraga odamatan no tama halo agresaun fízika hasoru lezadu ho lezada. Prokuradór hanoin katak arguidu hanesan funsionáriu ida no hatene katak hahalok hanesan ne'e ladi'ak maibé arguidu nafatin halo. Ho konsiderasaun sira ne'e hotu, husu ba tribunál atu kondena arguidu tuir konviksaun tribunál koletivu nian.

Entretantu defeza konsidera katak iha produsaun ba prova arguidu konfesa faktu hotu iha akuzasaun, arrepende ona ninia hahalok no promete sei la repete hikas nia hahalok ne'e iha futuro. Defeza reforsa liu tan katak antes julgamentu ne'e arguidu buka lezadu/a sira nune'e sira konsege dame malu. Arguidu mós hatudu kolaborasaun di'ak ho tribunál, iha oan na'in lima no serbisu hanesan funsionáriu ho rendimentu kada fulan US\$510.00. Tanba ne'e, defeza husu ba tribunál atu fó justisa ba arguidu tuir ninia sala.

Depoizde alegasaun finál, tribunál halo alterasaun la-subtansial kona-ba faktu iha akuzasaun bazeia ba artigu 273 KPP. Aleinde ne'e, bazeia ba artigu 274 KPP tribunál halo alterasaun ba kualifikasaun jurídika husi krime danu ho violénsia ba fali krime danu simples ne'ebé previstu iha artigu 258 KP ho moldura penál to'o tinan 3 ka multa no krime ofensa ba integridade fízika simples (artigu 145 KP) ho moldura penál to'o tinan 3 ka multa, tanba tribunál konsiente katak danu no ofensa refere la eminente ba lezadu no lezada sira nia vida. Prokuradór no defeza konkorda ho alterasaun ne'e no la persija prazu atu kontesta alterasaun refere.

Desizaun

Tribunál prova katak arguidu lanu no tebe odamatan restaurante nian to'o aat no basa lezadu Muhamad dala ida iha hasan parte karuk. Maski arguidu hatene katak restaurante babain taka iha tuku 20:00-21:00 kalan maibé arguidu ba iha tuku 23:00 kalan no laiha ona hahan. Bazeia ba prova ne'e no akordu dame husi parte sira, nune'e tribunál konklui prosesu ne'e no omologa akordu dame ne'e.

14. Krime kontrabandu

Nú. Prosesu : 0028/18.OESIC
Kompozisaun Tribunál : Koletivu

Juis : Dr. Hugo da Cruz Pui, Dr. Yudi Pamunkas, Dr. Evangelino Belo
Prokuradór : Dr. Mateus Nesi
Defeza : Dr. Marcelino Marques Coro
Desizaun : Inzensaun ba pena

Iha 26 Juñu 2020, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguida Elizabeth Cono ho arguidu Simão Pedro Elu hasoru Estadu RDTL, iha Distritu Oekusi.

Akuzasaun Prokuradór

Prokuradór akuza katak iha 17 Feveireiru 2018, iha oras tuku 02:00 madrugada, arguida ho arguidu sira halo importasaun sasan ilegal husi Indonezia tama mai iha territóriu Timor-Leste no la liuhusi Alfandega hodi selu taxa ba Estadu RDTL. Ho nune'e, arguida no arguida hetan kapturasaun husi Polísia Nasionál Timor-Leste, Unidade Polísia Fronteira (UPF). Arguida Elizabeth hatama mina gazolina litru 1225, mina gazoel litru 510 no mina rai litru 175 no arguidu Simão hatama mina gazolina litru 1030, mina gazoel litru 510 no mina rai litru 175. Arguida ho arguidu sira prátika krime ne'e no desvia-an atu la selu taxa ba iha Diresaun Alfandega ne'ebé hamosu prejuizu ba Estadu.

Prokuradór akuza arguida no arguidu kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova sira

Iha julgamentu, arguida no arguidu sira konfesa integralmente ba faktu sira iha akuzasaun no deklarata katak arrepende ona sira ninia hahalok. Arguidu ho arguida mós promete sei la repete hahalok hanesan iha futuru. Arguidu no arguida haktuir tan katak hafoin akontesimentu ne'e, sira selu ona taxa ba Estadu liuhusi Ministériu Públiku nia konta bankária. Arguida Elisabeth deklarata katak nia iha oan na'in rua no serbisu hanesan negosiante ho rendimentu kada fulan US\$150.00 no foin primeiravés mai hatan iha tribunál. Arguidu Simão deklarata katak nia sei klosan, serbisu hanesan motorista kareta *Angguna* ho rendimentu kada fulan US\$100.00.

Tribunál decide la rona ona depoimentu husi testemuña sira husi Unidade Polísia Fronteira (UPF) tanba arguidu no arguida sira konfesa integralmente ba faktu hotu iha akuzasaun.

Alegasaun final

Prokuradór konsidera arguidu no arguida sira provadu komete krime kontrabandu tuir faktu sira iha akuzasaun. Prokuradór haktuir katak hahalok sira hanesan ne'e fó risku ba Estadu RDTL la hetan reseitas doméstika tanba arguidu ho arguida desvia-an atu la selu taxa ba Estadu. Tanba ne'e, husu ba tribunál atu kondena arguidu no arguida tuir artigu 316 KP.

Entretantu defeza husu ba tribunál atu aplika pena ne'ebé kmaan ba arguidu no arguida tanba konfesa integralmente ba faktu sira iha akuzasaun no arrepende ona ba sira ninia hahalok. Aleinde ne'e, arguidu ho arguida mós kolabora di'ak ho tribunál no rekopera ona prejuizu Estadu nian tanba antes julgamentu arguidu ho arguida ho vontade rasik selu ona taxa ba Estadu liuhusi Ministériu Públiku nia konta bankária.

Desizaun

Tribunál konsidera arguidu ho arguida provadu hatama mina gazoel, gazolina no mina rai tuir faktu iha akuzasaun ho ilegalmente nune'e la selu taxa ba Estadu. Bazeia ba faktu provadu sira no tetu mós ba sirkunstánsia hotu-hotu ne'ebé asociadu iha krime ne'e, tribunál konklui prosesu ne'e no decide aplika inzensaun ba pena tuir artigu 318 KP tanba antes julgamentu ne'e, arguidu ho arguida voluntariamente selu ona taxa ba Estadu liuhusi Ministériu Públiku nia konta bankária.

15. Krime kontrabandu

Nú. Prosesu	: 0036/18.OESIC
Kompozisaun Tribunál	: Koletivu
Juis	: Dr. Hugo da Cruz Pui, Dr. Evangelino Belo, Dr. Yudi Pamukas
Prokuradór	: Dr. Mateus Nesi
Defeza	: Dr. Marcelino Marques Coro
Desizaun	: Inzensaun ba pena

Iha 30 Juñu 2020, Tribunál Distritál Oekusi prezide julgamentu leitura akordaun ba krime kontrabandu ne'ebé envolve arguida Beneditha Ola kontra Estadu RDTL, iha Suku Bobometo Sub-distritu Oesilo, Distritu Oekusi.

Akuzasaun Prokuradór

Prokuradór akuza katak iha 09 Marsu 2018, iha oras tuku 20.00 kalan, iha fronteira Oesilo-Poto RAEOA, arguida hatama pupuk urea kilograma 50 hamutuk saku tolu ho ilegalmente nune'e la selu taxa ba Estadu liuhusi Diresaun Alfandega. Arguida nia hahalok ne'e hamosu prejuizu ba Estadu tanba la hetan reseitas doméstika. Arguida hetan kaptura husi Polísia Nasionál Timor-Leste, Unidade Polísia Fronteira (UPF)

Prokuradór akuza arguida kontra artigu 316 KP kona-ba krime kontrabandu ho moldura penál tinan 2 to'o tinan 6 prizaun ka multa.

Produsaun ba prova sira

Iha julgamentu, arguida konfesa integralmente ba faktu sira iha akuzasaun no deklara katak arrepende ninia hahalok. Arguida mós promete sei la repete hahalok hanesan iha futuru, foin

primeiravés mai hatan iha tribunál, serbisu soru tais, ho rendimentu kada fulan US\$60.00 no iha oan na'in hitu. Arguida haktuir katak nia selu ona taxa ba Estadu liuhusi diresaun Alfandega.

Tribunál decide la rona ona depoimentu testemuña sira husi Unidade Polísia Fronteira (UPF) tanba arguida konfesa integralmente ba faktu hotu iha akuzasaun.

Alegasaun final

Prokuradór konsidera arguida provadu komete krime kontrabandu tuir faktu sira iha akuzasaun. Tanba ne'e, husu ba tribunál atu kondena arguida tuir artigu 316 KP kona-ba krime kontrabandu.

Entretantu defeza husu ba tribunál atu aplika pena ne'ebé kmaan ba arguida tanba iha produsaun ba prova arguida konfesa integralmente ba faktu sira iha akuzasaun no arrepende ona ba nia hahalok. Aleinde ne'e arguida mós kolabora di'ak ho tribunál, iha oan na'in hitu ho rendimentu kada fulan mínimu tebes.

Desizaun

Depois avalia faktu sira, tribunál prova katak arguida hatama duni pupuk urea kilograma 50 hamutuk saku tolu ho ilegalmente nune'e la selu taxa ba Estadu. Bazeia ba faktu provadu ne'e no tetu mós ba sirkunstánsia sira hanesan arguida foin primeiravés mai hatan iha tribunál, arguida serbisu soru tais iha oan na'in hitu no antes julgamentu arguida voluntariamente selu ona taxa ba Estadu liuhusi Diresaun Alfandega, ho nune'e, tribunál konklui prosesu ne'e no decide aplika inzenaun ba pena tuir artigu 318 KP tanba antes julgamentu no arguida ho voluntariamente selu ona taxa ba iha Diresaun Alfandega.

Atu hetan informasaun kompleitu, favór kontaktu:

Ana Paula Marçal

Diretora Ezekutiva JSMP

Diresaun e-mail: ana@jsmp.tl

Telefone: (+670) 33238883 | 77040735

Website: <https://jsmp.tl>

info@jsmp.tl